

仲景傷寒補亡論

仲景傷寒補亡論卷第十二

河南郭雍撰次

病可溫十三條

病不可灸七條

病可灸八條

病不可刺八條

病可刺二十九條

病不可水十條

病可水八條

病不可火十一條

病可火二條

火邪三條

病可溫十三條

雍曰仲景本論門自三陰三陽至發汗吐下以後證

而終自病可溫以下本論原無門目其論說皆仲景之言其見于三陽三陰諸門者王叔和重出于脈經以備倉猝尋按今依脈經所撰錄諸後

仲景曰大法冬宜服熱藥及灸

又師曰病發熱頭痛脈反沈若不差身體疼痛當救其裏宜溫藥四逆湯雍曰凡溫藥皆用四逆湯厥脈細者宜當歸四逆湯凡脈微欲絕及脈不出者通脈四逆湯內有久寒者當歸四逆加吳茱萸生薑湯主之

又曰下利腹脹滿身體痛先溫其裏宜四逆湯

又曰自利不渴者屬太陰以其藏有寒故也當溫之
宜四逆輩

又曰少陰病其人飲食入口則吐心中溫溫欲吐復
不能吐始得之手足寒脈弦遲若膈上有寒飲乾嘔
者不可吐當溫之宜四逆湯

又曰少陰病脈沈者急溫之宜四逆湯

又曰下利欲食者就當溫之

又曰下利脈遲緊爲痛未欲止當溫之得冷者滿而

便腸垢

又曰下利其脈浮大此爲虛以強下之故也設脈浮革因爾腸鳴當溫之宜當歸四逆湯

又曰少陰病下利脈浮濇者必嘔汗出必數更衣反少當溫之

又曰傷寒醫下之續得下利清穀不止身體疼痛急當救裏宜溫之以四逆湯

龐氏以凡病發熱頭疼脈反沈若不差身體疼痛者脈浮遲表熱裏寒下利清穀者汗出熱不去內拘急

支節疼四逆者下利厥逆惡寒者下利腹痛脹滿身
疼痛脈浮者凡五證先用四逆湯溫其裏得利止乃
可隨證用藥攻表也

病不可灸七條

仲景曰微數之脈慎不可灸因火爲邪則爲煩逆追
虛逐實血散脈中火氣雖微內攻有力焦骨傷筋血
難復也常氏云宜桂枝去芍藥加蜀漆牡蠣龍骨救
逆湯欲其有汗宜柴胡桂枝湯

又曰脈浮當以汗解而反灸之邪無從出因火而盛

病從腰以下必重而痺名爲火逆若欲自解當先煩
乃有汗隨汗而解何以知之脈浮故知汗出當解
又曰火逆下之因燒針煩躁者桂枝甘草龍骨牡蠣
湯主之

又曰脈浮熱甚而灸之此爲實實以虛治因火而動
必咽燥吐血

又曰傷寒脈浮醫以火迫劫之亡陽驚狂臥起不安
者桂枝去芍藥加蜀漆牡蠣龍骨救逆湯

龐氏曰灸及燒針之後證以火劫者並宜火劫法治

之煩躁驚及狂用六石風引湯九良柴胡加龍骨牡蠣湯亦通用

又曰不當灸而悞灸令火邪入腹干錯五臟重加煩死雍曰凡火邪逆證者宜桂枝甘草龍骨牡蠣湯

病可灸八條

仲景曰燒針令其汗針處被寒核起而赤者必發奔豚氣從少腹上衝心者灸其核上一壯與桂枝加桂湯更加桂

又曰少陰病得之一二日口中和其背惡寒者當灸

之

又曰少陰病吐利手足不逆冷反發熱者不死脈不至者灸少陰七壯雍曰凡灸少陰下利諸證皆兼服四逆湯

又曰少陰病下利脈微瀉嘔而汗出必數更衣反少當溫其上灸之一云灸厥陰五十壯

當灸百會

又曰諸下利皆可灸足大都五壯

一云七壯

商邱陰陵泉

又曰下利手足厥無脈灸之不溫脈不還反微喘者死少陰負趺陽者爲順也

又曰傷寒脈促手足厥逆可灸之爲灸少陰厥陰主逆

龐氏曰當灸不灸令病人冷結久而彌固氣衝心必死

病不可刺八條

雍曰脈經與可刺不可刺二門所載素問靈樞經語又有異者今改從本經字有當者卽從脈經仍據所出之處以別非仲景之言

靈樞經曰九刺之禁 新內勿刺已刺勿內 大怒

勿刺已刺勿怒 方醉勿刺已刺勿醉 大勞勿刺
已刺勿勞 大飢勿刺已刺勿飢 大渴勿刺已刺
勿渴 大驚大恐必定其氣乃刺之又曰粗工勿察
是謂伐身

靈樞又曰毋刺熇熇之熱毋刺漉漉之汗毋刺渾渾
之脈此刺病與脈相逆者

又曰五藏之腧出于背者灸之則可刺之則不可

靈樞又曰熱病身熱甚陰陽皆靜

脈經作爭

者勿刺之其

可刺者急取之不汗出則泄所謂勿刺者有死徵也

靈樞又曰上工刺其未生者也其次刺其未盛者也其次刺其已衰者也脈經云粗工逆此謂之伐形

靈樞又曰熱病不可刺者有九一曰汗不出大顙發赤噦者死二曰泄而腹滿甚者死三曰目不明熱不已者死四曰老人嬰兒熱而腹滿甚者死五曰汗不出吐下血者死六曰舌本爛熱不已者死七曰咳而衄汗不出出不至足者死八曰髓熱者死九曰熱而瘕者死凡此九者不可刺也脈經無此素問靈樞禁不刺者甚多詳見補亡禁刺門

仲景曰太陽傷寒者加溫針必驚也常氏云宜服逆救湯

病可刺二十九條

仲景曰太陽病頭疼至七日自愈者其經竟故也

竟字

仲景作盡三里穴

若欲再作經者針足陽明使經不傳則愈

龐氏云補

又曰太陽病初服桂枝湯而反煩不解者當先刺風池風府却與桂枝湯則愈

又曰傷寒腹滿而譫語寸口脈浮而緊者此爲肝乘

脾名曰縱刺期門

又曰傷寒發熱嗇嗇惡寒其人大渴欲飲水漿者其腹必滿若自汗出小便利其病欲解此肝乘肺也名曰橫刺期門

又曰陽明病下血譫語此爲熱入血室但頭汗出者當刺期門隨其實而瀉之澱然汗出則愈

又曰婦人中風發熱惡寒經水適來得之七八日熱除脈遲身涼胸脇下滿如結胸狀譫語此爲熱入血室當刺期門隨其實而瀉之叔和曰平病云熱入血

室無犯胃氣及上二焦雍曰與此相反豈謂藥不謂針耶

又曰太陽與少陽併病頭痛頸項強而眩時如結胸心下痞鞭當刺大椎第一間肺俞肝俞慎不可發汗發汗則譫語脈弦五日不止當刺期門

又曰少陰病下利便膿血可刺

又曰婦人懷身傷寒腹滿不得小便從腰以下重如有水氣狀懷身七月太陰當養不養此心氣實當刺寫勞宮及關元小便利則愈

又曰傷寒喉痺刺手少陰在腕當小指後動脈是也
針入三分補之素問曰有病身熱汗出煩滿不爲汗
解此爲何病岐伯曰汗出而身熱者風也汗出而煩
滿不解者厥也病名曰風厥巨陽主氣故先受邪少
陰與其爲表裏也得熱則上從之從之則厥也表裏
刺之飲之湯劑雍曰此傷寒感異氣變而爲風厥也
宜刺太谿崑崙服茯苓桂枝甘草大棗湯

靈樞經曰熱病三日氣口靜人迎躁者取之諸陽五
十九刺以瀉其熱而出其汗實其陰以補其不足素

問曰病甚者爲五十九刺靈樞曰所以五十九刺者
兩手內外側各三凡十二痛五指間各一凡八痛足
亦如之痛也亦八頭入髮一寸傍三分各三凡六痛更入
髮三寸邊各五凡十痛耳前後口一作耳下項中各一
凡六痛巔上一顙會一髮際一廉泉一風池二天柱
二此五十九穴也

雍曰五十九刺出于二經見于仲景叔和二書然未
聞有善用之者古人第存之而不敢廢上古之法後
有靈樞十一症亦多不能解者亦不能廢法耳

靈樞經曰熱病先膚痛寧鼻充面取之皮以第一針

五十九苛軫

一云苛幹

鼻索皮于肺不得索之火火心也

軫車上前後兩端橫木也言鼻塞之甚內外不通亦猶軫之橫塞也

又曰熱病噎乾多飲善驚臥不得安

一作臥不能起

取之膚

肉以第六針五十九目皆青索肉于脾不得索之木

本肝也

又曰熱病面青腦痛手足煩取之筋間以第四針針

于四逆

一作邊

筋辟

一作壁

目浸索筋于肝不得索之金

金肺也

又曰熱病數驚癎瘕而狂取之脈以第四針急瀉有餘者癎疾毛髮去索血一作脈于心不得索之水水腎也

又曰熱病而身重骨痛耳聾而好瞑取之骨以第四針五十九刺骨痛食一作不食齧牙齒耳青一作清索骨于腎不得索之土土脾也

又曰熱病先身傍教

太素作倚本經作瀉倚而熱

煩悶乾唇口噤

取之脈以第一針五十九膚脹口乾寒熱

本經作寒汗出索

脈于心不得索之于水水者腎也

又曰熱病頭痛顙顙目瘳脈痛善衄厥熱病也取之
以第三針視有餘不足寒熱痔

又曰熱病體中病重腸中熱取之以第四針于其膺
及下諸指間索氣于胃絡得氣也

又曰熱病俠臍急痛胸脇支滿取之湧泉與太陰陽
明經作陰以第四針針噓裏

又曰熱病而汗且出之經作及脈順可汗者取之魚際

太淵大都太白寫之則熱去補之則汗出汗出太甚

者取內踝上橫文一作脈以止之

又曰熱病七八日脈口動喘而短者兼刺之汗且自出淺刺手大指間

素問曰熱病先胸脇痛手足躁刺足少陽補足手一作

太陰病甚者爲五十九刺王冰云足少陽邱虛取之又曰熱病始手臂痛者刺手陽明太陽而汗出止王云臂痛列缺主之取汗商邱主之

又曰熱病始于頭首者刺項太陽而汗出止王云足太陽天柱主之

又曰熱病先身重骨痛耳聾好瞑刺足少陰病甚爲

五十九刺

又曰熱病先眩胃而熱胸脇滿刺足少陰少陽

又曰熱病始于足脛者刺足陽明而汗出止此出甲乙經

病不可水十條

仲景曰發汗後飲水多者必喘以水灌之亦喘常氏云微喘宜麻黃杏子甘草石膏湯雍曰飲水多者五苓散

又曰傷寒大吐大下之極虛復極汗出者其人外氣

佛鬱復與之水以發其汗因得噦所以然者胃中寒
冷故也常氏曰可小溫中湯小半夏湯雍曰胃寒理
中湯噦者半夏湯五苓散

又曰陽明病潮熱大便微鞭可與承氣湯不堅勿與
之若不大便六七日恐有燥屎欲知之法可與小承
氣湯若腹中不轉失氣者此但初頭鞭後必溏不可
攻之攻之必脹滿不能食欲飲水者與水則噦雍曰
可溫中湯噦者小半夏湯

又曰下利其脈浮大此爲虛以強下之故也設脈浮

革因爾腸鳴當溫之與水噦雍曰宜溫中湯

又曰病在陽當以汗解而反以冷水啖之若灌之其熱被却不得去彌更益煩皮上粟起意欲飲水反不渴宜文蛤散若不差與五苓散若寒實結胸無熱證者與三物小陷胸湯白散亦可服身熱皮粟不解欲引衣自覆若以水灌之洗之益令熱却不得出當汗而不汗卽煩假令汗出已腹中痛與芍藥三兩如上法

又曰寸口脈浮大醫反下之此爲大逆浮則無血大

則爲寒寒氣相搏則爲陽鳴醫乃不知而反飲冷水
令汗大出水得寒氣冷必相搏其人則餒常氏云宜
草豆蔻散

又曰寸口脈濡而弱濡則惡寒弱則發熱濡弱相搏
藏氣衰微胸中苦煩此非結熱而反薄居水漬布冷
銚貼之陽氣遂微諸府無所依陰脈凝聚結在心下
而不肯移胃中虛冷水穀不化小便縱通復不能多
微則可救聚寒心下當奈何也

千金翼曰太陽病小便利者爲水多心下悸雍曰宜

小半夏加茯苓湯

仲景曰凡得時氣病至五六日而渴欲飲水飲不能多不當與也何者以腹中熱尙少不能消之便更與人作病也至七八日大渴欲飲水者猶當依證而與之與之常令不足勿極意也言能飲一斗與五升若飲而腹滿小便不利若喘若噦不可與之也飲而忽然大汗出是爲自愈也

又曰凡得病反能飲水者此爲欲愈之病其不曉病者但聞病人飲水自愈小渴者乃縱與之飲因成其

補不可復救也龐氏曰凡病非大渴不可與飲冷水
若小渴口燥咽乾少少呷水滋潤之若不與水則乾
燥無由作汗煩喘而死者多已但勿令足意飲也若
不汗將來燥渴甚者但足意飲之勿疑若小渴強飲
者致停飲心下滿結喘而死者多矣其有熱脈數尙
可作汗而解出者干幸之幸也

病可水八條

仲景曰太陽病發汗後若大汗出胃中乾煩躁不眠
其人欲得飲水者當稍飲之令胃中和則愈

又曰厥陰病渴欲飲水者少少與之愈

又曰太陽病寸緩關浮尺弱其人發熱汗出復惡風寒不嘔但心下痞者此爲醫下之也若其不下病人不惡寒而渴者爲轉屬陽明小便數者大便則堅不更衣十日無所苦也渴欲飲水少少與之但以法救之渴者宜五苓散

又曰寸口脈洪而大數而滑洪大則營氣長滑數則胃氣實營氣長則陽盛怫鬱不得出身胃實則堅難大便則乾燥三焦閉塞津液不通醫發其汗陽氣不

週復重下之胃燥畜熱大便遂燥小便不利營衛相
搏心煩發熱兩眼如火鼻乾面赤舌燥齒黃焦故大
渴過經成壞病針藥所不能制與水灌枯槁陽氣微
散身寒溫衣覆令汗出表裏通然其病卽除形軀都
不同此愈非治法但醫所當慎妄犯傷營衛

又曰嘔吐而病在膈上後思水者解急與猪苓散飲
水亦得也千金亦曰必思煮餅急思水者與五苓散
飲之

餘同

又曰霍亂而頭痛發熱身體疼痛熱多飲水者屬五

苓散

龐氏曰病人水藥入口則吐或渴而嘔者或汗後脈尚浮而煩渴者或下利渴而小便不利者或嘔而小便不利者五苓散皆主之或因渴停水心下短息者難治

又曰若頭痛無熱但狂言煩躁不安精神不與人相當勿以火導之但以猪苓散方寸匕服之當連飲新水三升卽令指刺喉中吐去之病隨手愈若不能吐者而強與水水停則結心下也當以藥吐之不爾更

致危病若當吐不時以猪苓散吐之其死殆速矣亦可針之佳水飲膈實難治此三死一生也

千金文

病不可火十一條

仲景曰太陽中風以火劫發其汗邪風被火熱血氣流溢失其常度兩陽相熏灼其身發黃陽盛則欲衄陰虛小便難陰陽俱虛竭身體則枯燥但頭汗出劑頸而還腹滿微喘口乾咽爛或不大便久則譫語甚者至噦手足躁擾循衣摸床小便利者可治雍曰宜桂枝去芍藥加蜀漆牡蠣龍骨救逆湯五苓散

又曰太陽病醫發汗遂發熱惡寒復下之則心下痞
此表裏俱虛陰陽氣併竭無陽則陰獨復加燒針因
胸煩面色青黃膚瞶者難治今色微黃手足溫者易
愈雍曰發熱惡寒宜小柴胡湯心下痞者生薑瀉心
湯火逆宜救逆湯

又曰陽脈浮陰脈弱則血虛虛則筋急其脈沈者營
氣微也其脈浮而汗出如流珠者衛氣衰也營氣微
者加燒針則血流不行更發熱而煩躁也雍曰和營
衛宜柴胡桂枝湯因燒針煩躁者宜桂枝甘草龍骨

牡蠣湯也

又曰傷寒脈浮醫以火劫迫之亡陽必驚狂臥起不安者屬桂枝去芍藥加蜀漆牡蠣龍骨救逆湯

又問曰得病十五六日身體黃下利狂欲走師脈之言當下清血如豚肝乃已後如師言何以知此師曰寸口脈陽浮而陰濡陽浮爲風陰濡爲弱爲少血一作

虛

浮虛受風少血發熱惡寒洒淅項強頭眩醫加以火熏等令汗出惡寒遂罷客熱因火而發怫鬱蒸肌膚身目爲黃小便微難短氣從鼻中出血而復下之

胃無津液泄利遂不止熱瘕在於膀胱蓄結成積聚
狀如豚肝當下不下心亂迷憤奔走赴水不能自制
畜血若去目明心之此皆醫所爲他無禍患微輕者
得愈重極者不治雍曰宜犀角地黃湯有熱如狂者
加黃芩

又曰形作傷寒其脈不弦緊而弱弱者必渴被火者
譫語弱者發熱脈浮解之當汗出愈雍曰宜救逆湯
又曰太陽病以火熏之不得汗其人必躁到經不解
必圜血雍曰宜犀角地黃湯

又曰陽明病被火額上微汗出而小便不利必發黃
常氏云可茵陳湯五苓散

又曰陽明病其脈浮緊咽乾口苦腹滿而喘發熱汗
出不惡寒反惡熱身體重發汗則躁心憤憤而反譫
語加溫針必怵惕煩躁不得眠雍曰宜桂枝甘草龍
骨牡蠣湯若悞下者梔子豉湯龐氏曰脈浮緊不可
下恐變風溫宜詳之

又曰少陰病欬而下利譫語是謂被火氣劫也故小
便必難爲強責少陰汗也常氏云宜用救逆湯解其

火氣五苓散通其小便

又曰太陽病二日反躁反熨其背大汗出火氣入胃
胃中水竭躁煩必發譫語十餘日振慄自下利者此
爲欲解也故其汗從腰以下不得汗其人欲小便不
得反嘔欲失溲足下惡風大便鞭小便常數而反不
數及多大便已其頭卓然而痛其人足心必熱穀氣
下流故也雍曰大便堅及煩躁譫語者宜調胃承氣
湯以和其胃不得小便者宜五苓散

病可火二條

仲景曰下利穀道中痛當溫之當以熬鹽末熨之一方炙枳實熨之千金翼云宜炙枳實若熬鹽等如炒蠶沙之類皆可熨龐氏言枳實末與鹽相兼用益佳或單用枳實末非枳實須逐片炙用卽枳殼也

龐氏曰臍中冷結不可便熨冷氣攻心腹必死須先用藥溫之久而可熨之又曰臍下冷結或關陽去者大小便不通服藥雖多不見效炒鹽熨臍下須臾卽通若病人已服巴豆甘遂大黃輕粉之類過多者略通則大利而損人宜詳之

火邪三條

龐氏曰傷寒醫以火置臥床下或周身用火迫劫汗或熨或悞灸皆火邪也仲景曰傷寒脈浮醫以火迫劫之亡陽必驚狂或臥起不安者宜桂枝去芍藥加蜀漆牡蠣龍骨救逆湯又曰火逆下之因燒針煩躁者桂枝甘草湯主之雍曰可代救逆湯用之

龐氏曰灸及燒針後證似火劫者並宜以火劫治之煩躁驚及狂用金匱風引湯尤良柴胡加龍骨牡蠣亦通用

千金方曰其病形不可灸因火爲邪散走血脈傷脈
尙可傷藏則劇并俞冗腫黃汗自出經絡外爛肉腐
爲癰膿此爲火疸醫所傷也雍曰千金翼有火疸一
證錯簡在狐惑後又併微數之脈不可灸證合爲一
又云應用瀉心湯其言舛謬不可續微數之脈不可
灸已見本門獨留火疸一證似屬火邪故錄于此外
臺以瀉心湯治蝕于上部屬狐惑亦係火疸微數脈
于後其悞久已

仲景傷寒補亡論卷第十二終

仲景傷寒補亡論卷第十三

河南郭雍撰次

兩感症五條

陰陽交十一條

三陽合病十五條

結胸二十二條

心下痞二十五條

兩感症五條

素問曰人之傷於寒也則爲病熱熱雖甚不死其兩感於寒而病者必不免於死

又曰兩感於寒者病一日則巨陽與少陰俱病則頭

痛口乾煩滿而渴二日則陽明與太陰俱病則腹滿
身熱不欲食譫語三日少陽與厥陰俱病則耳聾囊
縮而厥水漿不入不知人六日死病源曰水漿不入
不知人則六日而死其義甚明

問曰素問言不知人六日死又言三日其氣乃盡何
也雍曰兩感之病表裏俱傳三日而六經竟雖竟而
氣未絕故經竟之後又三日其氣乃絕其言三日者
謂三日而陽明之氣方盡故也言六日者通傳經之
日也傳經三日氣盡故言六日何以明之三日經竟

之時五藏已傷六府不通榮衛不行如是之後又三日氣盡乃死帝以疑而問之而岐伯告以陽明氣血盛不知人三日而後死也經旣曰如是之後則是傳六經竟之後也又曰不知人三日則是陽明未絕之時也經竟甚明而或者謂其傳六經而後死夫能再傳則不死矣本以邪氣傳至少陽欲傳太陰之間而太陰已先與陽明同受邪氣不能更受後來再傳之邪雖太陰復欲以邪傳之三陽而三陽邪氣亦皆滿亦不更爾容受兩邪相拒六經皆滿俱不能流注傳

泄是以六府不通營衛不行水漿不入不知人以待
陽明之氣盡而後死矣陽明胃經也胃爲血氣之海
朝夕灌注營衛六府十二經者皆胃之氣血也諸經
雖絕獨陽明氣血未盡故又三日而後死也六日死
三日死只是兩感一證或者謂再傳爲六日死邪氣
直入陽明爲三日死遂分兩證此說甚悞未通經意
又不當改經血氣盛爲邪氣盛仍有血氣隨邪而盡
之說皆失也反覆讀經當自得之龐氏曰兩感之疾
素問無脈候今詳之凡脈沈者皆屬陰也一日脈當

沈而六沈者少陰也大者太陽也二日脈當沈而長
三日脈當沈而弦乃以合表裏之脈沈長弦皆隱於
沈大也凡三陰無合病惟三陽有合病今三陽與三
陰合病故其脈似沈緊而大似沈實而長亦類革至
之死脈也

王仲弓曰監丞曰本論言兩感俱作治有先後發表
攻裏本自不同近時張翊云論有傷寒醫下之利不
止身疼痛者急當救裏後身疼痛清便自調者急當
救表今可依倣而治旣云治有先後則宜先救裏內

纔溫則可醫然救表亦不可緩也朱氏曰內尤爲急也雍曰救裏藥用四逆救表藥用桂枝湯此法出於不得已猶愈於束手待斃矣仲景曰救裏藥用四逆救表藥用桂枝湯更看臨時寒熱多少參訂之幸有表裏一輕者則急治其重者也然其治大宜速過三日則水漿不入雖有藥不納已張亦未悟此也

兩感論曰病人有不治之證古人不復論方藥者立論固可如此醫家亦可如此而人有父兄母弟至親不幸遇疾如此能坐視不思拯援萬死一生之術哉

孫真人論精神困者病久不差欲死者但與藥救之
十人中或差三四以是言則人雖有不治之病其氣
未絕之間亦無不服藥待盡之理今觀兩感之證以
陰陽之經邪氣皆滿不相來往傳注故爲必死之候
乘其三日內邪氣未滿榮衛可通之時早爲療治尙
或不死若六經邪氣三日旣滿則水漿不入湯藥何
緣可納勢須於初覺之時急治之然初感之日誰能
斷然不疑知其爲兩感擬議之間已不及矣是以必
至於死也雍謂湯藥至此不如針灸湯藥雖可內攻

而內攻未必至雖至而藥病方有勝負針艾可以外泄隨其輕重必有泄而出者昔號太子之死扁鵲治之蓋外泄之術也方其厥氣上行絕陽破陰有甚於兩感不知人之證扁鵲以爲陽脈下墜陰脈上爭令氣閉而不通夫厥氣亦邪氣也陽脈陰脈者卽陽經陰經也陽脈下墜猶傳之陽也陰脈上爭相搏而不能受也氣閉不通以陰陽俱邪實故不通不通則水漿不入矣越人於是不施湯劑而遽用針石外取三陽五會有間太子蘇是知湯不能達於外而針尙可

泄於外也既蘇而得爲五分之熨以逐餘邪邪去然後得服湯藥二句而復故倘使湯先必不能得入何緣有復蘇之理今兩感之邪與尸厥之邪其暴殺人一也誠能做越人先針後湯之術取之三陽使三陽氣緩然後灼三陰之會以泄其邪邪氣未盡方以湯攻使無所逃既盡則以湯養之雖生死未可必而其爲治有所據而不謬矣故愚意欲先取崑崙委中乃去其血以泄太陽次取三里以泄陽明後取邱墟陽陵泉以泄少陽三陽氣既緩急灸三陰交穴以泄三

陰之邪此穴亦難取或上下左右少差卽能中一陰
二陰不中必三陰俱中仍須審度再分灸之上陰陵
泉可泄太陰太谿可泄少陰大敦可泄厥陰炷如麥
粒緩緩灸之徐泄其氣不必以多爲貴也雖其如此
亦不可以不灸三陰交先併泄之然後分得陰陽得
陰陽緩乃可服湯泄不患多治不厭速蓋有三日之
期不可待也所以不敢用熨者必爲火邪故惟用湯
二者皆陰氣閉不通之疾大略相似而其爲寒熱則
異也以是思之則三陰合病之中脈有負者亦宜灸

刺以治之且如陽明少陽合病其脈負者少陽木氣盛也瀉邱墟陽陵泉則少陽木氣不得不平補三里則陽明之土不得不旺或不精補瀉者第以刺爲瀉灸爲補古人皆有是法如是則雖死亦有可生理所謂十中三四愈者未必不如孫氏之言也雖然天下之事固有大小同異而其理一也昔洪水橫流汎濫於中國禹決九州然後人得平土而居之愚因誦此而得通病有外泄之理使早得而熟之則越人氏之學何難至之顏淵曰舜何人也子何人也有爲者亦

若是況盧扁乎惜余得之暮年所用之小也然亦不敢不告諸來者故備言之

陰陽交十一條

素問三十三篇曰有溫病者汗出輒復熱而脈躁疾不爲汗衰狂言不能食岐伯曰病名陰陽交交者死也人所以汗出者皆生於穀穀生於精今邪氣交爭於骨肉而得汗者是邪却而精勝也精勝則當能食而不復熱復熱者邪氣也汗者精氣也今汗出而輒復發熱者是邪勝也不能食者精無俾也汗而熱留

者其壽可立而傾也

又曰熱論口汗出而脈尙躁盛者死今脈不與汗相應此不勝其病也其死明矣狂言者是失志失志者死今見三死不見一生雖愈必死也雍曰汗出輒復熱一死脈尙盛二死狂言失志三死也

靈樞二十三篇曰熱病已得汗而脈尙躁盛者此陰脈之極也死其得汗而脈靜者生雍曰此二證脈經皆以爲陰陽交疑以得汗者爲交不得汗者非交也又曰熱病已得汗而脈尙躁且復熱勿膚刺喘甚者

死

脈經曰熱病陰陽交者死又曰熱病煩已而汗脈當靜

又曰太陽病已得汗脈反躁盛者是陰陽交死復得汗脈靜者生

又曰熱病陰陽交者熱煩心躁太陰寸口脈兩部尙躁盛是陰陽交死得汗脈靜者生雍曰已上二證與前同靈樞不言陰陽交此言陰陽交爲異脈經所載皆古書此二證莫知所出也

又曰熱病陽進陰退頭獨汗出者死陰進陽退腰已下至足汗出者死陰陽俱進汗出已熱如故亦死陰陽俱退汗出已寒慄不止鼻口氣冷亦死已上十證並見脈經陰陽交部

又曰熱病所謂併陰者熱病已汗因得泄是謂併陰故治一作活

又曰熱病所謂并陽者熱病已得汗脈尙躁盛火熱汗出雖不汗出若衄雁氏云和而衄者是謂并陽故治雍曰

并陰陽二證諸書無所見亦類陰陽交故脈經繼之

於其後

陰陽交論曰傷寒兩感陰陽交二證皆出於素問仲
景發明兩感而不及陰陽交王叔和載陰陽交而不
及兩感後世因仲景而明兩感之證獨陰陽交多所
未解予考陰陽交之證大抵傷寒脈不爲汗解者皆
陰陽交也何以不爲汗解曰獨陰獨陽之病一汗則
解陰兼陽陽兼陰之病一汗不能解蓋汗解其陰陽
脈不得退汗解其陽陰脈不得退此所以不爲汗衰
也然則陰兼陽陽兼陰者何病也余悉索之則兩感

之證似之一日太陽與少陰俱病二日陽明與太陰俱病皆陰兼陽陽兼陰也陰陽相兼而病故其病名曰交是以太陽汗解而少陰未得解陽明汗解而太陰未得解者豈非因其相交而不爲汗衰乎觀二證之言初若不相同合二證陰陽之理則無異也故素問言兩感本非病名至陰陽交則曰病名陰陽交蓋兩感言其始感陰陽交者著其名也故陰陽交之證有曰復得汗脈靜者生是邪氣再出而復生也仲景亦曰發表攻裏本自不同豈非再乎故遇斯病者當

參二證而治之然則仲景發明兩感而不及陰陽交
叔和載陰陽交而不言兩感意豈異乎更俟賢哲明
之

三陽合病十五條

龐氏曰凡三陰無合病惟三陽有合病十四證其三
陰三陽相并而病者卽兩感是也雍曰合病十四證
已見三陽經今重列於下非惟便於檢按亦相附參
考易明庶無差矣

仲景曰太陽與陽明合病者必自下利葛根湯主之

又曰太陽與陽明合病不下利但嘔者葛根加半夏湯主之

又曰太陽與陽明合病喘而胸滿者不可下宜麻黃湯

仲景問曰何緣得陽明病答曰太陽病若發汗若下若利小便亡其津液胃中乾燥因轉屬陽明不更衣大便難者此陽明病也雍曰無太陽證者宜調胃承氣湯凡轉屬之法與合病微不同且如太陽陽明合病必須解兩經之邪故仲景不捨葛根麻黃二湯若

轉屬陽明可以少俟太陽證衰卽以調胃承氣湯專攻陽明一舉而兩得之蓋太陽爲既往則當日衰陽明爲方來則當日盛故也

又曰二陽併病太陽證罷但發潮熱手足絳絳汗出大便難而譫語者下之則愈宜大承氣湯朱氏曰若太陽證不罷不可下宜桂枝麻黃各半湯小發其汗雍曰若太陽不罷者宜少俟一日又不罷則依朱氏法

又曰二陽併病太陽初得病時發其汗汗先出不徹

因轉屬陽明續自微汗出不惡寒若太陽病證不罷者不可下下之爲逆如此可小發汗設面色緣緣正赤者陽氣怫鬱在表當解之薰之一作蒸若發汗不徹不足言陽氣怫鬱不得越當汗不汗其人躁煩不知痛處乍在腹中乍在四肢按之不可得其人短氣但坐以汗出不徹故也更發汗則愈何以知汗出不徹以脈濇故知之雍曰宜桂枝麻黃各半湯

問曰太陽陽明合病併病二者之證何以別之朱氏曰脈浮大而長頭疼腰痛肌熱鼻乾目疼者合病也

太陽初得病時發其汗汗先出不微因轉屬陽明續自微汗出不惡寒者併病也雍曰合病脈浮大而長者未必惡寒其脈浮緊而長無汗者當惡寒也皆宜桂枝麻黃各半湯有下症者自宜前法

仲景曰太陽與少陽併病頭項強痛或眩冒時如結胸心下痞鞭者當刺大椎第一間肺俞肝俞慎不可發汗發汗則譫語脈弦五六日譫語不止刺期門雍曰仲景言少陽不可發汗故併病亦不可汗也

又曰太陽少陽併病心下鞭頸項強而眩者當刺大

椎肺俞肝俞慎勿下之雍曰仲景曰太陽病轉入少陽脈沈遲者與小柴胡湯龐氏曰脈緊者小柴胡湯少加牡蠣大抵少陽多宜和解故宜小柴胡湯太陽和解亦宜用之

又曰太陽少陽併病太陽病不解轉入少陽者脇下鞭滿乾嘔不能食往來寒熱尙未可吐下脈沈緊者與小柴胡湯龐氏曰脈緊者小柴胡加桂枝脇下鞭滿加牡蠣

又曰陽明少陽合病必下利其脈不負者順也負者

失也互相剋賊名爲負也雍曰宜理中湯下利而厥者宜四逆湯其脈不弦者爲順脈弦者陽明土負也急瀉邱墟陽陵泉以泄少陽木急灸三里以補陽明土也

仲景曰三陽合病腹滿身重難以轉側口不仁面垢譫語下之則額上生汗手足厥冷若自汗出者白虎湯主之

又曰三陽合病脈浮大上關上但欲眠睡目合則汗龐氏曰不言弦者隱於長大也常氏云可桂枝柴胡

各半湯雍曰卽柴胡桂枝湯也

問曰仲景言本太陽病因醫下之腹滿時痛轉屬太陰者此爲兩感乎爲合病乎雍曰非也合病雖亦有轉屬者要之兩陽俱作也兩感則表裏陰陽俱病矣難經曰人之有尺猶木之有根枝葉雖枯槁根本將自生兩感則根葉皆將枯無自而生矣合病太陽太陰雖名一陰一陽而實非相爲表裏之經互相有生救謂如太陽雖病而少陰不受病太陰雖病而陽明不受病正類枝葉雖枯槁根本自生之象是以不爲

兩感況本非邪氣傳注醫誤下之移太陽之疾入於太陰非兩經俱作之證甚明是以仲景用桂枝加芍藥湯桂枝加大黃湯也

結胸二十二條

雍曰結胸痞氣陽毒陰毒狐惑百合六證雖有見於前證中者而龐氏皆以其異證故別列於後今依龐氏之法益以斑黃血衄證爲十證

仲景曰問病有結胸有藏結其狀何如曰按之痛寸脈浮關脈沈名曰結胸龐氏曰寸口脈浮關上尺中

皆沈或沈緊

又曰何爲藏結答曰如結胸狀飲食如故時時下利寸脈浮關脈小細沈緊名曰藏結舌上白胎滑者難治常氏云可刺關元在臍下

又曰藏結無陽證不往來寒熱一云寒而不熱其人反靜舌

上胎滑者不可攻也常氏云可刺關元穴

又曰病人脇下素有痞連在臍旁痛引小腹入陰筋者此名藏結死常氏云可刺大赫在腹部第二行

又曰發病於陽而反下之熱入因作結胸病發於陰

而反下之因作痞也所以成結胸者此下之太早故也朱氏曰傷寒本無結胸以其熱下之早熱氣乘虛而入痞結不散變成結胸王仲弓曰杜壬云傷寒在表誤下者宜急頻與理中湯丸更加人參多得解不作結胸若大腹轉損發厥者愚與四逆湯便安若胃中雖和而病不退候再有裡證再下之朱氏云以前來下湯未是故也

又曰若心下滿而鞭痛者此爲結胸也大陷胸湯主之但滿而不痛者此爲痞宜半夏瀉心湯

又曰結胸證其脈浮大者不可下下之則死朱氏云
尙宜發汗也脈浮是表證兼以小柴胡湯等先發表
表證罷後以結胸藥下之常氏云用巴豆黃連餅子
封臍中灸之卽諸方中所謂聖餅子灸法也
又曰結胸證悉具煩躁者亦死

又曰太陽病脈浮而動數浮則爲風數則爲熱動則
爲痛數則爲虛頭痛發熱微盜汗出而反惡寒者表
未解也醫反下之動數變遲膈內拒痛胃中空虛客
氣動膈短氣煩躁心中懊懣陽氣內陷心下因鞭則

爲結胸大陷胸湯主之。雍曰：此卽病發於陽而反下之之證也。若不結胸，但頭汗出，餘處無汗，劑頸而還，小便不利，身必發黃者，可茵陳蒿湯。雍曰：若單服茵陳濃汁調五苓散亦可。

又曰：傷寒六七日，結胸熱實，脈沈而緊，心下痛，按之石韌者，大陷胸湯主之。

又曰：傷寒十餘日，熱結在裏，往來寒熱者，與大柴胡湯。但結胸無大熱者，此爲水結在胸膈也。但頭微汗出者，大陷胸湯主之。雍曰：可下證中自但結胸下分。

別爲二證故用二藥不同

又曰太陽病重發汗而復下之不大便五六日舌上

燥而渴日晡所小有潮熱

一云日晡所發心胸大煩

從心下至少

腹鞭滿而痛者大陷胸湯或以大陷胸丸下之

又曰小結胸證正在心下按之則痛脈浮滑者小陷胸湯主之

又曰太陽病二三日不得臥但欲起心下必結脈微弱者此本有寒分反下之若利止必作結胸未止者四日復下之此作協熱利也常氏云脈微弱有寒者

可增損理中丸作結胸者大小陷胸湯協熱利者白頭翁湯

又曰太陽病下之後其脈數促一作縱不結胸者此爲

欲解也脈浮者必結胸常氏云可增損理中丸脈緊者必咽痛

常氏云可桔梗甘草湯脈弦者必兩脇拘急常氏云可小柴胡湯脈細數

者頭痛未止常氏云可蔥鬚湯脈沈緊者必欲嘔常氏云可七物黃連

湯脈沈滑者協熱利常氏云可白頭翁湯脈浮滑者必下血常氏

云可藥皮湯

又曰病在陽應以汗解之反以冷水灌之誤之其熱

被却不得去彌更益煩肉上粟起意欲飲水反不渴者服文蛤散若不差者與五苓散寒實結胸無熱證者與三物小陷胸湯白散亦可服龐氏云無熱證者與三物白散小陷胸湯非也愚以爲熱者小陷胸湯寒者三物白散

又曰結胸者項亦強如柔痙狀下之則和龐氏云宜服大陷胸湯

又曰太陽少陽併病而反下之成結胸心下鞭下利不止水漿不下其人心煩常氏云可半夏生薑二瀉

心湯

活人書云西晉崔行功云傷寒結胸欲絕心膈高起
手不得近大小陷胸皆不差者此是下後虛逆氣已
不理而毒復上攻氣毒相搏結於胸中當用枳實理
中丸先理其氣次療諸疾古今用之如神應手而愈
今常氏謂增損理中丸卽是也龐氏曰近世治結胸
多用針頭丸用硫黃陽起石者若病熱毒甚者必死
惟治冷結寒實耳

活人書云結胸三種有大結胸不按而痛胸連腹堅

鞭大陷胸湯主之有小結胸按之心下痛小陷胸湯主之有水結胸在膈間亦名結胸小半夏加茯苓湯小柴胡去棗加牡蠣湯主之又有寒熱二證有熱實結胸者胸中煩躁心內懊懣舌上燥渴脈沈滑者皆熱證也大陷胸湯主之有寒實結胸無熱證者三物白散枳實理中丸主之

王仲弓曰治結胸當用小陷胸湯甚佳大陷胸湯太峻如不得已則用大陷胸湯丸脈浮者不得用大陷胸丸宜用小陷胸枳實理中丸結胸用黃連巴豆灸

法得解心下痞鞭宜旋覆代赭湯若外尙未解胸滿
脇痛者宜小柴胡湯雍曰凡用仲景藥皆當準此爲
式蓋今古不同病人血氣不能勝藥力醫工不能精
於診視非古人比故用藥可不及不可大過如脈浮
者尤宜從朱氏用發表藥表證罷以結胸藥治之

心下痞二十五條

仲景曰病發於陰而反下之因作痞也龐氏曰發熱
惡寒爲發於陽悞下則爲結胸無熱惡寒爲發於陰
悞下則爲痞朱氏曰傷寒本無痞因身冷醫反下之

遂成痞枳實理中丸最良

又曰心下滿而鞭痛者爲結胸但滿而不痛名爲痞
宜半夏瀉心湯朱氏曰此湯藥蓋本理中又參黃芩
湯也審知是痞先用桔梗枳殼湯尤妙緣桔梗枳殼
行氣下膈故先之龐氏曰設使下後津液入裏胃虛
上逆寒結在心下故宜用辛甘發散之今用半夏以
下氣用苦以去濕兼通心氣又甘草力大使乾薑黃
連不能相惡此用半夏瀉心湯之意也

又曰脈浮而緊而復下之緊反入裏則作痞按之自

濡但氣痞耳常氏云可小陷胸湯生薑瀉心湯雍曰
宜半夏瀉心湯

又曰心下痞按之濡其脈關上浮者大黃黃連瀉心
湯主之龐氏曰寒濕迫心氣不行欲作熱也朱氏曰
結胸與痞關脈皆須沈若關浮則熱結故以三黃瀉
心也

又曰心下痞而復惡寒汗出者附子瀉心湯主之

大黃

黃連瀉心湯
內加附子

又曰本以下之故心下痞與瀉心湯痞不解其人渴

而口燥煩小便不利者五苓散主之

一云忍之一日乃愈

又曰傷寒汗出解之後胃中不和心下痞鞭乾噫食臭脇下有水氣腹中雷鳴下利者生薑瀉心湯主之
龐氏云胃中不和爲少陽本氣所制故用生薑之辛味也

本字當作木字

又曰傷寒中風醫反下之其人下利日數十行穀不化腹中雷鳴心下痞鞭而滿乾嘔心煩不得安醫見心下痞謂病不盡復下之其痞益甚此非結熱但以胃中虛客氣上逆故使鞭也甘草瀉心湯主之龐氏

云胃虛故加甘味

又曰傷寒服湯藥下利不止心下痞鞭服瀉心湯已復以他藥下之利不止醫以理中與之利益甚理中者理中焦此利在下焦赤石脂禹餘糧湯主之復利不止當利其小便龐氏云五苓散主之

又曰傷寒大下後復發汗心下痞惡寒者表未解也不可攻痞當先解表表解乃可攻痞解表宜桂枝湯攻痞宜大黃黃連瀉心湯龐氏曰前加附子是汗出多而惡寒表將解而裏結未除也此證是發汗無汗

而惡寒故先須解表也朱氏曰結胸與痞表未解者不可攻也

又曰傷寒發熱汗出不解心下痞硬嘔吐而下利者大柴胡湯主之龐氏云汗出嘔吐下利是胃中津液燥裏有結實非胃虛也故大柴胡湯下之

又曰傷寒發汗若吐若下解後心下痞鞭噫氣不除者旋覆代赭石湯主之朱氏曰有旋覆代赭湯證其人或欬逆氣虛先服四逆湯胃寒先服理中丸次服服此湯良

又曰太陽病外證未除而數下之遂協熱而利利下不止心下痞鞭表裏不解者桂枝人參湯主之

又曰傷寒吐下後發汗虛煩脈甚微八九日心下痞鞭脇下痛氣上沖咽喉眩冒經脈動惕者久而成痙常氏云可服茯苓甘草白朮生薑湯振痙湯此湯未見方恐是悞寫

又曰太陽中風下利嘔逆表解者乃可攻之其人絳熱汗出發作有時頭痛心下痞鞭滿引脇下痛乾嘔短氣汗出不惡寒者此表解裏未和也十棗湯主之

朱氏曰此湯尤難用須是表證罷身涼不惡寒者乃可用若表未解者切不可用也雍曰十棗湯乃攻裏大峻藥也非和裏藥也設或悞用殺人過于承氣常氏言此證傳寫之悞故朱氏亦畏而戒之宜代用檳榔散

又曰太陽病醫發汗遂發熱惡寒因復下之心下痞表裏俱虛陰陽氣併竭無陽則陰獨復加燒針因胸煩面色青黃膚瞶者難治今色微黃手足溫者易愈常氏云痞者可生薑瀉心湯發熱惡寒可小柴胡湯

火逆可桂枝去芍藥加蜀漆牡蠣龍骨救逆湯

又曰病如桂枝證頭不痛項不强寸脈微浮胸中痞
鞭氣上沖咽喉不得息者此爲胸有寒也當吐之宜
瓜蒂散

又曰太陽少陽併病心下鞭頸項强而眩者當刺大
椎肺俞肝俞慎勿下之雍曰其詳見併病中

又曰太陽病寸緩關浮尺弱其人發熱汗出復惡寒
不嘔吐但心下痞者此以醫下之也常氏云可生薑
半夏二瀉心湯雍曰此證汗出發熱惡寒表證不罷

宜先服柴胡桂枝湯次服枳實理中丸

又曰太陰之爲病腹滿而吐食不下自利益甚時腹自痛若下之必心下結鞭常氏云可增損理中丸桂枝加芍藥湯

又曰陽明病心下鞭滿者不可攻之攻之遂利不止者死常氏云可半夏瀉心湯也已攻而利者四逆湯又曰脈雙弦而遲者必心下硬脈大而緊者陽中有陰也可下之宜大承氣湯

活人書曰已痞服瀉心湯不愈然後可用陷胸湯下

之

又曰外證未解而心下妨悶者非痞也謂之支結柴胡桂枝湯主之脇胸滿微結小柴胡加乾薑牡蠣湯主之

王仲弓曰生薑瀉心半夏瀉心二湯和平宜常用之

仲景傷寒補亡論卷第十三終